

Wakita na a puwatertaa Paul ge emnde a KAULAUSIYA

Ga use á Paul

¹ Wakita na yá anƙwa puwaná ba iya Paul, a eksisaa Dadaamiya geni yá gevge slebela á Yaisu *Almasiihu, njá anƙwa puwaná antara Timaute egdza emmemiya am elva á Yaisu Almasiihu. ² Njá puwakurte wakita na ge kure emnde á Dadaamiya na kwá am Kaulausiya. Ekkure, kwa egdzar mama-aha á miya na kwa dábete Yaisu Almasiihu an ervaunƙe á kure palle, Ed-demiya Dadaamiya a magakuranmaga ngurna, a vakurteva hairire.

Maduwa á Paul ge Kaulausiya-aha

³ Ba kelaa ma njá anƙwa maga maduwa adaba kure wá, njá slafaná we á n̄ere jipu ge Dadaamiya Eddeɗara ge Yaakadada Yaisu *Almasiihu, njá slafaná we adaba kure, ⁴ adaba cenaneɗerancena labare á fetarfire á kure áte Yaisu Almasiihu, antara wayakurwaya an emnde na tá anƙwa d̄aba Dadaamiya bademme. ⁵ Kwá anƙwa maga una, adaba fakurtefa tama á kure áte duksa shagera na a fakuraa Dadaamiya am samaya na. Duksa n̄anna keni kwa cenán kinekineka am labare á higa na elva a jirire na. ⁶ Labare á higa n̄anna wá, n̄ane wá, ba seke njá á nafa, á wálá, daaci á yá egdzere shagera. Adaba hyemhye am duniya bademme. Am kure keni hyemhye ba

estuwa. Adaba kwaye ba vacite na kwa cenvaa ge zuŋŋwire geni Dadaamiya magakuránmaga ngurna jirire na, sem vatena kwá far ba maga ba duksa na shagera.

⁷ Ba Aipafras una a de mbakurse labare ñanna, wayaŋerwáyá jipu dawale ñanna an erwaunđe á ñere palle. Ñere antara ñane, ña emnde a slera á Yaisu *Almasiihu. Ñane á aŋkwa maganá slera ge Yaisu Almasiihu an erwaunđe-aara palle. Daaci ba ñane una gevge sera á ñere antara we á ñere am dagave á kure. ⁸ Ba ñane una a se mbedañeru labare á kure geni Shedekwe á Dadaamiya a vakurte mága wayavire ge kure.

Jirire á názena á ñalaterwa Paul ge emnde a Kaulausiya

⁹ Adaba una ñanna, kwaye ba vacite na cenañeráncená labare á kure, sem vatena, ñá ñala ba Dadaamiya adaba kure, geni kwá diyeddiye názena á kataná Dadaamiya ázekure bademme, antara geni kwá shansha ilmu na á vatertá Shedekwe á Dadaamiya ge emnde na, geni a eksakuraareka eŋkale am duksa bademme. ¹⁰ An ilmu ñanna maa, kwá de shá zlaláva na ni á zlayáter ge emnde á Yaakadada, zlaláva na á kataná ñane. Daaci bademme á názena kwá de maganá kure, kwá de maga ba názena á de maganá nampire ge ñane. Diya á kure áte Dadaamiya keni á de farfe ba kelaazare. ¹¹ Ná aŋkwa ñala Dadaamiya zlaɓe adaliye geni á gakurvege midale-aha an hakuma-aara na jauje ge duksa bademme na, lauktu kwá de gevge emnde a farwaunđe. Daaci kwá de dzegwándzegwa

ɓasha duksa baɗemme. ¹² Slafawananslafa we á kure ge Eddemiya Dadaamiya an higa á kure baɗemme, aɗaba ba ɗane una a magakuraa pute, geni kure keni kwá de lyevalya dza á kure am duksa shagera na a fater ge emnde cuɗeɗɗe. Duksa ɗanna wá, am zlanna-aara na aɗkwa parakkire jipu na. ¹³ Ba ɗane una a lyamise am erva á slekse á tabeɗammire, a samiya á sem kwára á Egdza-aara na wayaawaya jipu na. ¹⁴ Daaci á ba kya erva an Egdza-aara palle, a varamise, a yamiyaarhe.

*Ngahire á *Almasiihu antara slera-aara*

¹⁵ Baaka edda una á nanna Dadaamiya an ice, amá Yaisu *Almasiihu wá, ndza naranna emnde. ɗane garava á Dadaamiya, á maramiya njá á Dadaamiya. Ba ɗane una *Egdza á Dadaamiya, male arge duksa-aha na a nderanaa Dadaamiya baɗemme. Aɗaba ɗane wá, ndza aɗkwa am fakta á duksa baɗemme. ¹⁶ Dadaamiya a nderaa duksa baɗemme á kya erva an ɗane. Duksa-aha na tá am samaya antara una-aha áte haha, duksa-aha na tá nanna emnde antara una tá nanka emnde, malika-aha na tá an hakuma am samaya antara male-aha-aatare baɗemme, Dadaamiya a nderateraa á kya erva an Egdza-aara ɗanna baɗemme, a nderater ba ge ɗane. ¹⁷ Zuɗɗwe á ba ɗane arge duksa baɗemme. Duksa baɗemme á njá an unɗule-aara keni, á ɗáterá ba ɗane an hakuma-aara. ¹⁸ Ba ɗane una á kwára emnde na fartarfe áte ɗane. ɗane wá, ba seke ire, emnde a fetarfe keni ta ba seke vuwa-aara. Ba ɗane una fakte á duksa baɗemme, zuɗɗwe á ba ɗane zlaɓe á daliye ge tseta am

faya, geni a gevge ire arge duksa bademme. ¹⁹ Wayetewáyá Dadaamiya geni Egdza-aara á de eksa ba nane am duksa bademme. ²⁰ A naba magaa pute geni bademme á názena a nderanaa nane, názena am samaya antara una áte haha, a sharánsha mela antara nane bademme, adaba uzhe na a puwanvaa Egdza-aara áte dzaŋgala na. A magaa una nanna geni duksa bademme a sharánsha hairire antara nane.

²¹ Werre wá, ndza tegakurevtega antara Dadaamiya, ndza kwa kelaade-aha-aara adaba shagerkire á názena kwa maganaa kure. ²² Amá kina wá, Dadaamiya a magakuraa pute umele ge kure, shakuránsha mela antara nane adaba emtsa á Egdza-aara am sarte na gevge urimagwe a emtsehe na. A magaa una nanna geni kwa gevge emnde na dzayye ervaunđe á kure; watse kwá de katafke-aara baaka kwazlambire am ervaunđe á kure dekideki. ²³ Amá wa, yawánka dába Yaisu *Almasiihu, tsawaatse ba dzánzdane, gazlauka dekideki, fautefa tama á kure áte názena tá ndahaná emnde a bala labare á higa, elva a Yaisu Almasiihu na. Labare á higa nanna wá, balaratersebale ge emnde bademme am huđe á duniya. Ba iya Paul keni ya sleslera á Dadaamiya ba ge balaterá waazu á una nanna ge emnde.

Slera na a faraa Dadaamiya ge Paul

²⁴ Yá higa jipu am zlada-aaruwa na yá shaná adaba kure. Ba seke una ni Yaisu *Almasiihu shushe zlada werre na wá, iya keni yá shushe zlada kina, geni yá zlannaazle slera-aara na a

shu zlada adaba nane na. Yá shá zlada adaba emnde na ta fetaare áte nane garevge ba seke vuwa-aara na. ²⁵ Iya, ganevge sleslera á emnde a fetarfe, ba Dadaamiya una a fiyaare slera nanna geni yá melakurumele, yá magaterá waazu á elva-aara ge emnde, yá gulanaaka. ²⁶ Werre wá, Dadaamiya ndza maraaka elva nanna dekideki ndza á ba an shebe. Amá kina wá, a naba maraterse ge emnde na tá ankwá daba nane na. ²⁷ Dadaamiya wayetewáyá maratera slera shagera na watse á de maganá nane na ge emnde-aara. Slera nanna wá, baaka argena dekideki an shagerire, ankwá á maganá am dagave á emnde na garevka Yahudiya-aha keni bademme. Amaana: Yaisu Almasiihu ankwá am kure, baaka shaige geni kwá dem zlanne tate na átekwa Dadaamiya an yaikkire-aara. ²⁸ Ba Yaisu Almasiihu una ná ankwá balaterá elva-aara ge emnde, ná ankwá faterem am tada-aatare ge emnde bademme, ná mbaterse duksa áte nane an ilmu na a vanertaa Dadaamiya, adaba ná kátá emnde bademme tá vante er-vauñde-aatare ge Yaisu Almasiihu, tá gyebye am elva á Dadaamiya. ²⁹ Adaba una nanna ngudansengude hude geni yá zlanazle slera nanna an ndzedá na á vitá Yaisu Almasiihu.

2

¹ Yá kátá kwa cenancena wava yaikke na yá ankwá maganá ya adaba kure, antara emnde á Lawdikiya ira emnde na itare keni narika an ice-aatare. ² Yá ankwá á maga una nanna geni bademme á kure kwa shansha ndzedá

ge d̄aba Yaisu Almasiihu, kwa wayaavewaya am dagave á kure áte ervaun̄de palle, antara geni kwa cenvaacena elva na a sakuransehe ge Dadaamiya, daaci kwá tsaatse átekwa, ñane keni á gá barka áte kure. Elva ñanna ndza an shebe, a sakuransehe ge Dadaamiya na wá, ba Yaisu Almasiihu. ³ Tara en̄kale antara ilmu na á vatertá Dadaamiya ge emnde na keni bademme an̄kwa am ñane.

⁴ Yá bakurá una, geni a badakuruka ura umele ba dey an elva emtakemtake. ⁵ Ma baaka ba ire-aaruwa am dagave á kure keni, am ervaun̄de-aaruwa yá á ba am dagave á kure. Daaci yá higa jipu áte kure ad̄aba duksa bademme kwá an̄kwa maganá á ba áte un̄jule-aara, antara ad̄aba dzañdzañire á fetarfe á kure áte Yaisu Almasiihu.

Shifa jirire wá, á ba am Yaisu palle

⁶ Ba seke una ni lyakurvalya Yaisu *Almasiihu ge Yaakadadire na wá, z̄láláva á kure keni a gevge ba seke una á kataná ñane. ⁷ Ba seke nafa, máki á wálá, á vela slalwe-aara á dem haha lauktu á tse degdege na wá, ge kure keni ba estuwa, njawinja degdege am erva-aara, ekhyawanaaka fetarfire á kure, d̄abaud̄aba á ba áte una ta mbakurseme na. Slafawannaaslafa we á kure ge Dadaamiya ba kelaazare.

⁸ Faufa hyema geni a kedakuraaka ura umele ba dey an diya na tá mbesa emnde á ba am duniya na, baaka nampire-aara d̄ekideki, ad̄aba saaka á sawa aza Yaisu Almasiihu, á sawa aza

jini-aha antara male-aha-aatare. ⁹ Ba Yaisu Almasiihu palle una a de eksa Dadaamiya am njá-aara bademme. ¹⁰ Daaci am nja á kure antara Yaisu na wá, shakuransha duksa bademme am shifa á kure. Nane wá, malika-aha na tá an hakuma am samaya bademme, tá á ba am erva-aara.

¹¹ Gakurevge tsawe palle antara Yaisu Almasiihu wá, dakuremda am shedekwe. Amá dema am shedekwe na tá maganá emndimagwaha-ka, á maganá Yaisu Almasiihu an hakuma-aara. Amaana: a mbedakurse ervaunde á kure na ndza á dákurá á dem haypa na. ¹² Am sarte na ta magakuraa baptisma, una nanna á mára una ni kwa tsetaa am faya átirpalle antara nane. Fakurtarfe geni Dadaamiya a tsante nane am faya an hakuma-aara, fakurtarfe geni á de tsakurtetse kure keni. ¹³ Werre, ndza kwa ba seke emtsa-aha am ice á Dadaamiya adaba haypa-aha á kure, antara adaba ndza diyakurka shairiya-aha-aara. Amá kina wá, Dadaamiya a vakurtaa shifa anwaslire átirpalle antara Yaisu Almasiihu, a naba yamiyaare haypa-aha á miya bademme. ¹⁴ Haypa-aha nanna wá, ndza ba seke gema áte miya, hyephye ge mbedamiya am shairiya. Amá Dadaamiya a naba yamiyaa gema nanna, á ndavamiyuka mazla-aara adaba emtsa á Yaisu Almasiihu áte dzaŋgala. ¹⁵ A ganaa á ba áte dzaŋgala nanna midalire arge jini-aha antara male-aha-aatare bademme, a sluwatervaahe, a jaterse zherwe á katafke á emnde bademme.

¹⁶ Máki estuwa, a mberzarakurka geni labara

kwa za una? Bi labara kwa sha una? Labara magakurka munri na? Bi náza ja tere na antara kwaskwe á puwansepuwe? ¹⁷ Baďemme á una-aha ɲanna ndza miyenne-aareka emtsaade, ndza ba ge ufa duksa shagera na á de sawa na. Duksa ɲanna wá, ba Yaisu *Almasiihu. ¹⁸ Tá aɲkwa emnde umele, ta ganve ire-aatare ba seke ta emnde na wayarka gálá ire, tá aɲkwa baterán ge emnde umele keni geni gálá ire wá, shagerka, tá baterán ge emnde geni a yekaryeka an zhera á malika-aha, wayarwáyá jipu ge bálá názena tá zharaná am shene-aha-aatare keni. Jeba á emnde ɲanna wá, ta gala ire ba dey, dzama ire-aatare ba dzama ire á emnde am duniya. Vawaterteka barama ge maga una ɲanna am dagave á kure, a tegarakuraaka antara duksa shagera na á katafke á kure. ¹⁹ Itare, ta yiyiye an Yaisu Almasiihu na ɲane ire na, emnde na tá dƒaba ɲane baďemme ta vuwa-aara. Daaci máki mí dƒaba ba ɲane, vuwa baďemme, dzagwa á ubiya-aha antara perde-aha tá wálá á ba áte unɲule-aara, áte una á kataná Dadaamiya.

Emtsa átirpalle antara Yaisu, tsete átirpalle antara Yaisu

²⁰ Diyakurdiya geni emtsakuramtsa átirpalle antara Yaisu *Almasiihu, daaci baaka hakuma á jini-aha áte kure mazla-aara emtu? Ay ba estuwa wá, labara kwá njá ba seke mága á emnde na diyarka Yaisu Almasiihu na? Labara kwá fatersarfe ge shairiya-aha na a ba itare: ²¹ Gawanávteka ge duksa estuwa, zauka duksa estuwa, fauka erva áte duksa estuwa na? ²² Adƒaba jeba á shairiya-aha ɲanna, tá ndaha ba

elva á názena á de zlauzle á ba am duniya na. Ta jansaara ba emnde ge una-aha ñanna. ²³ Ge jirire wá, má ká cena shairiya-aha ñanna wá, ká cenán ba seke náza vante enjkale ge ura. Adaba a ba itare: sey kwá maga duksa ba kwakya ge daba Dadaamiya, sey kwá ganaaga ire á kure ba shagera, kwá ámbera maganá laruwa ge ire á kure. Amá una-aha ñanna bademme á de melakuruka d'ekid'eki geni kwá kwarukware ervaunđe á kure am emtanƙire á názena á kátá maganá vuwa á kure bademme.

3

¹ Diyakurdiya geni Dadaamiya a tsakurtehe am faya átirpalle antara Yaisu *Almasiihu emtu? Adaba una ñanna tatayautátaya kazlaña na am samaya am tate na anƙwa á njá Yaisu Almasiihu am nadafa á Dadaamiya. ² An enjkale á kure bademme, dzamaudzama ba kazlaña na am samaya na, dzamauka kazlaña na am duniya. ³ Adaba diyakurdiya geni shifa á kure werre na wá, emtsamtsa, Dadaamiya a tsakurtehe átirpalle antara Yaisu Almasiihu. Daaci shifa á kure anwaslire anƙwa antara Yaisu Almasiihu, a shebakuranvehe ge Dadaamiya ázeñara. ⁴ Ge jirire wá, shifa á kure ba Yaisu Almasiihu. Má de jesarja ñane, kure keni kwá de jesarje an ñane átirpalle am yaikkire-aara.

Zláláva werre antara náza vatena

⁵ Adaba una ñanna, shagerkire á názena jauje am ervaunđe á kure na sawansese bademme, a gevge ba seke lipa á katafke á kure. Yawanya

dakarire antara gwardzire antara mága em-tan̄kire na á kátá maganá vuwa á kure bademme, antara waya duksa an ervaun̄de á kure bademme. Adaba má kwá waya duksa an ervaun̄de á kure bademme, duksa n̄anna gevge ba seke dadaamiya á kure. ⁶ Kwaya n̄ane názena ni á piyater̄te ge emnde geni a faransareka ge Dadaamiya. Adaba una n̄anna tá an̄kwa am ervaun̄de á Dadaamiya. ⁷ Kure keni, am sarte na zlābe sakurseka am duksa-aha n̄anna, zlááva á kure ndza ba estuwa.

⁸ Amá kina wá, puwanvepuwe kazlāna-aha na bademme, mága ervaun̄de, mága kem̄ngerire, zlazla ura antara elva yaihyaihe. ⁹ Magawaterka fida ge emnde, adaba kure sakuresse am zlááva werre, puwakuranvepuwe kazlāna werre bademme, ¹⁰ kwa eksante zlááva umele an̄waslire. Una n̄anna keni a eptsakuranta ba Dadaamiya. Ba n̄ane una a de gakuranvege ervaun̄de á kure an̄waslire ba kelaazare, geni á gevge ba seke náza-aara, daaci kwá de diyeddiye Dadaamiya ba shagera. ¹¹ Daaci estuwa, baaka una Yahudiya-aha, una emnde á jeba umele. Baaka una emnde na ta am shedekwe, una emnde na ta baaka am shedekwe. Baaka una emnde na weraaka ire-aatare, una emnde na tá á kataliya á emnde bademme. Baaka una nave-aha, una emnde na tá kwára ire-aatare. Bademme á emnde ta ba kalkale áza Dadaamiya. Adaba ba Yaisu *Almasiihu palle una ura yaikke, an̄kwa á njá am ervaun̄de á emnde-aara bademme.

¹² Diyakurdiya geni zun̄n̄we a wayakurtaa

ba Dadaamiya emtsaade, daaci a naba dzerakursehe geni kwá gevge emnde-aara. Adaba una nanna, gawevge emnde a zevarze, emnde a maggwire á sawa am ervaunde, gawevge emnde a kemaare, emnde a ga ire á katafke á emnde umele, ira emnde a farvaunde. ¹³ Faufa ervaunde am dagave á kure. Má ura a naba magakurte emtanpire, naba yawanarye haypa-aha-aara. Yaakadada á miya a naba yamiyaare ge miya. Adaba una nanna, kure keni yawateraarye ge emnde umele. ¹⁴ Duksa yaikke wá, wayawavewayaya am dagave á kure. Adaba ba wayava palle una á jatermaare ge emnde bademme. ¹⁵ Hairire na a vakurtaa Yaisu Almasiihu na wá, yawanya a shapteshe am ervaunde á kure. Adaba Dadaamiya a dahakur ba ge una nanna, geni kwá gevge ba seke vuwa á ura palle. Daaci slafawanaslafa we á kure ge nane. ¹⁶ Yawanya a hyemhya elva á Yaisu Almasiihu am vuwa á kure. Tsahautsáha ba shagera am dagave á kure. Fawanemfa am vuwa ma ge ware á kure keni am dagave á kure, an ilmu na a vakurtaa Dadaamiya. Galaugala Dadaamiya an jabura, galaugala an lahe á emnde-aara, galaugala an lahe na ni kwa jansaare an hakuma á Shedekwe Cufedde. Galaugala Dadaamiya an lahe-aha nanna kwá ámbera slafaná we á kure an higa am ervaunde. ¹⁷ Slera á kure antara názena kwá ndahaná kure bademme, magaumága an zhera á Yaakadada Yaisu Almasiihu. Slafawanaslafa we á kure ge Eddemiya Dadaamiya an zhera-aara.

Shairiya-aha geni a njarinja emnde a fetarfe áte unḡule-aara

¹⁸ Ekkure ḡwasha-aha, faufa zherwe áte zala-aha á kure, ba seke una á zlayater ge emnde a ḡaba Yaakadada. ¹⁹ Ekkure keni zala-aha, wáyáuwaya an ḡwasha-aha á kure, fauka zlaḡa áte itare.

²⁰ Kina wá, yá elvan ge kure egdzara: Fawatersarfe ge dada-aha a kure antara mama-aha a kure am duksa baḡemme. Aḡaba má kwá maga una ḡanna, Yaakadada wayaawayá jipu. ²¹ Ekkure dada-aha á egdzara, fauka zlaḡa áte egdzara á kure ba dey, aḡaba má estuwa, á de nezla ervaunḡe á egdzara jipu.

²² Yá elvan ge kure kina nave-aha: Fawatersarfe ge dada-aha á kure am duksa baḡemme. Magawaterka slera aḡaba ice-aatare geni tá de zlebakurzleba, amá magawateranmaga slera an ervaunḡe á kure palle aḡaba fa-zherwe á kure áte Yaakadada á miya Yaisu *Almasiihu. ²³ Ma ta fakuraare ba slera-ara keni, magaumága an ervaunḡe á kure palle ba seke ta fakuraara emnde-ka slera ḡanna, kwá maganá ba ge Yaakadada Yaisu Almasiihu. ²⁴ A viyakuraareka geni ba Yaakadada Yaisu Almasiihu una á de vakurte laḡa á kure. Názena a fater ge emnde-aara am samaya na wá, á de vakurteva ge kure keni. Daaci edda á kure na kwá maganá slera kina wá, ba Yaisu Almasiihu. ²⁵ Amá edda una á magá emtaḡkire, ḡane keni á de pelansepele Yaakadada emtaḡkire-aara ma ware edda-aara keni, aḡaba Yaakadada wá, á de eggerka emnde ḡekideki.

4

¹ Yá elvan ba ge kure dada-aha á nave-aha: Nawateraana nave-aha á kure an jirire, magaumaga antara itare an unṅule-aara. A viyakuraareka geni kure keni anṅkwa Edda á kure am samaya.

Magaumága maduwa

² Yawánka mága maduwa dekiḍeki, ekkudauka ge maga maduwa kwá ámbera slafaná we á kure ge Dadaamiya. ³ Má kwá maga maduwa á kure wá, magaumága maduwa arge ṅere keni, geni Dadaamiya a vaṅerteva barama antara nara shagera ge balatera waazu á elva-aara ge emnde, ṅa palaternaapala jirire á elva á Yaisu *Almasiihu na ndza an sheḅe werre na bademme. Diyakurdiya yá am dangay kina keni, ta siya adaba ba una ṅanna. ⁴ Magaumaga maduwa geni a meliyumele Dadaamiya, ya palaternaapala elva-aara ge emnde an unṅule-aara.

⁵ Magaumága enkale am zlááva á kure am dagave á emnde na zlaḅe dabarka Yaisu Almasiihu. Kefawanaaka sarte shagera na a vakurtaa Dadaamiya geni kwá melaterumele na. ⁶ Tsatsawanaatsatse elva am mbuwe á kure ba shagera, a gevge emtake ba seke izhe. Diyaweddiye geni kwá de vanta estara jawapa shagera ge edda una á de ndava elva ázekure bademme.

Ga use á Paul am halavuwa á elva

⁷ Tikikus, ba ṅane una egdza emmemiya na wayamiwaya jipu, ṅane keni anṅkwa á maga slera á Yaisu *Almasiihu an ervaunḍe-aara palle, ṅere

antara nane wá, ná maga ba slera á Yaakadada palle. Á de bakuránba nane labare-aaruwa bademme. ⁸ Yá bela nane á dezekure, geni á de bakuránba nane labare á nere, á de vakurte antara ndzedá. ⁹ Ya ankwá bela Unaizimus egdza emmemiya na wayamiwaya jipu na á duwa antara nane á dezekure. Unaizimus wá, palle á kure ba ge kure, nane keni ba sledfaba Yaisu Almasiihu an ervaunđe-aara palle, tá de bakuránba itare názena á magavá áhuna bademme.

¹⁰ Tá ankwá gaku use-aatare tara Aristarkus, nane una nja kerde am dangay, ta antara Markus nane palle á kudere-aha-nara ge Barnabas. Má dámdá Markus á dezekure wá, lyauvalya á ba an higa ba seke una ndza ya ndakurndaa na.

¹¹ Ankwá á gaku use-aara Yaisu na tá dahaná an Yustus na nane keni. Sey ba emnde keye nanna njanje am Yahudiya-aha una tá ankwá maga slera antara iya áhuna ge sa emnde á sem *kwara á Dadaamiya. Ba itare una tá ankwá vite ndzedá jipu ahuna. ¹² Á ankwá gaku use-aara Aipafra keni, nane keni palle á kure ba ge kure, sleslera á Yaisu Almasiihu. Ba kelaazare á maga ba maduwa arge kure an ervaunđe-aara palle, geni kwá tsaatse dzandzane, kwá gevge emnde na gyairebgye am elva á Dadaamiya, antara geni kwá dfabetefaba názena á kataná Dadaamiya.

¹³ Yá ankwá zharaná á ba an ice-aaruwa wáva-aara ge magakuru slera ge kure antara emnde á Lawdikiya, antara ge emnde á Hiyairapaulis bademme. ¹⁴ Tara Lukas, dauktar á miya na

wayamiwaya jipu na, ta antara Daimas, tá anƙwa gaku use-aatare itare keni.

¹⁵ Gawaterga use-aaruwa ge egdzar mama-aha á miya emnde a fetarfe na tá am Lawdikiya. Gawanga use-aaruwa ge Nimfa keni antara emnde a fetarfe na ta jahava á mba-aara na bademme. ¹⁶ Ma ndakursendahe nalmesheri na am dagave á kure wá, vawartereva ge aiklasiya á Lawdikiya keni, itare keni a de ndarndaha am dagave-aatare. Emnde á Lawdikiya keni, a velarakurtevela umele na ta shanaa itare na, geni kure keni kwá se ndaha una ɲanna zlaɓe ádaliye am dagave á kure. ¹⁷ Bawanánba ge Arkipus wá: Slera na a faara Yaakadada Yaisu Almasiihu geni a magannaamaga na wá, a ewwáwa geni á zlannaazle.

¹⁸ Am tate na náwa ɲane na wá, yá anƙwa puweta ba iya Paul an erva-aaruwa geni yá gaku use. A viyakuraareka geni yá am danɓay na. A vakurteva Dadaamiya hairire.

Wakita á Dadaamiya
La Bible en wandala

copyright © 1999 Wycliffe Bible Translators, Inc.

Language: (Wandala)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 21 Feb 2024 from source
files dated 29 Jan 2022

dec75dd5-4784-5059-aa00-668d508a6b0d